

DOMENIE VI DI PASCHE

Antifone di jentrade cf. Is 48,20

Cun vôs di gjonde contait e fasêtu savê;
fasêtu rivâ fin ai ultins confins de tiere:
il Signôr al à liberât il so popul, aleluia.

Si dîs Glorie a Diu.

Colete

Diu onipotent, danus di celebrâ cun cûr e passion
chestis zornadis di gjonde in onôr di Crist resurît,
par podê mostrâ in ogni moment de nestre vite
ce che o stin fasint memorie.

Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE At 15,1-2.22-29

O vin decidût, il Spirtu Sant e nô,
di no metius intor nissune altre cjame, fûr di chêz robis che propit a coventin.

Dai Ats dai Apuestui

In chei dîs, ind jere int, vignude de Judee, che ur insegnavin ai fradis cussì: «Se no si fasêts
circoncidi seont l'usance di Mosè, no podêts salvâsi».

Stant che Pauli e Barnabe no jerin lafè dacuardi e a contindevin al ultin fin cun lôr, si destinà che
Pauli e Barnabe e cualchidun altri a lessin a Jerusalem dai apuestui e dai anzians par disberdeâ la
cuistion.

Alore i apuestui, i anzians e dute la glesie a pensarin ben di sielzi cualchidun di mandâlu a
Antiochie, insieme cun Pauli e cun Barnabe: Jude, che i disevin Barsabe, e Sile, oms une vore
puartâts dai fedêi. Ur consegnarin cheste letare: «I apuestui e i anzians a saludin i fradis di
Antiochie, de Sirie e de Cilicie che a jerin paians. O vin savût che cualchidun dai nestris, cence che
ur vessin dade incariche di sorte, a son vignûts a fâus stâ mât cui lôr discors, savoltant i vuestris
cûrs. Alore o vin destinât, ducj insieme, di sielzi un pôcs di lôr e di mandâusai insieme cui nestris
cetant cjârs Barnabe e Pauli, umign che a àn vodade la lôr vite al non dal nestri Signôr Jesù Crist. O
vin mandât par tant Jude e Sile, che us contaran ancje lôr chestis robis a vôs. O vin decidût, il Spirtu
Sant e nô, di no metius intor nissune altre cjame, fûr di chêz robis che propit a coventin: di
stratignîsi des cjars sacrificadis ai idui, dal sanc, dai nemâi scjafoiâts e de sporcjetât. O fasarêts ben
duncje a stâ vuardâts di chestis robis. Stait ben».

Peraule di Diu.

SALM RESPONSORIAL dal Salm 66

R. Duj vualtris popui laudait il Signôr.

O ben:

R. Aleluia, aleluia, aleluia.

Che Diu al vedi dûl di nô e nus benedissi,
che al fasi lusî parsore di nô la sô muse,
par che si cognossi su la tiere la tô strade,
framieç dai forescj la tô salvece. R.

Che a gjubilin i forescj e a berlin di gjonde,
parcè che tu tu judichis i popui cun justizie
e i forescj de tiere tu ju dâs dongje. R.

Che ti laudin i popui, Diu,
che ti laudin i popui di dute la tiere.
Che nus benedissi Diu,
par che lu rispietin ducj i confins de tiere. **R.**

SECONDE LETURE Ap 21,10-14.22-23

L'agnul mi mostrà la citât sante che e vignive jù dal cîl.

Dal libri de Apocalis di san Zuan apuestul

L'agnul mi traspuartà in spirt suntue mont une vore alte e mi mostrà la citât sante, Jerusalem, che e vignive jù dal cîl, di Diu, iluminade de glorie di Diu. Il so sfandôr al è compagn di une perle di valôr straordenari, come piere di jasp stralusint. La citât e je cerclade di une murae grande e alte cun dodis puartis: parsoare di chestis puartis a son dodis agnui e nons scruts, i nons des dodis tribûs dai fîs di Israel. A jevade trê puartis, a tramontane trê puartis, a misdi trê puartis e al amont trê puartis. Lis muris de citât a poin sun dodis çocui, cun scrit parsoare i nons dai dodis apuestui dal Agnel. Li dentri no viodei nissun templi, parcè che il so templi a son il Signôr Diu, paron di dut, e l'Agnel. La citât no à dabisugne de lûs dal soreli ni dal lusôr de lune parcè che i fâs lûs la glorie di Diu e la sô lum al è l'Agnel.

Peraule di Diu.

CJANT AL VANZELI Zn 14,23

R. Aleluia, aleluia.

Se un mi vûl ben, al metarà in pratiche la mêm peraule, al dîs il Signôr,
e gno Pari i volarà ben e li di lui o vignarìn a stâ.

R. Aleluia.

VANZELI Zn 14,23-29

Il Spirtu Sant us fasarà vignî tal cjâf dut ce che us ài dit.

Dal vanzeli seont Zuan

In chê volte, Jesù al disè ai siei dissepui: «Se un mi vûl ben, al metarà in pratiche la mêm peraule, e gno Pari i volarà ben e o vignarìn di lui e o larìn a stâ li di lui. Chel che no mi vûl ben, nol met in pratiche lis mês peraulis. E la peraule che vualtris o scoltais no je mêm ma dal Pari che mi à mandât. Us ài ditis chestis robis biel che o soi ancjemò cun vualtris. Ma il Confuartadôr, il Spirtu Sant che il Pari al mandarà tal gno non, lui us insegnarà dut e us fasarà vignî tal cjâf dut ce che us ài dit. Us lassi la pâs, us doi la mêm pâs. No us e doi come che le dâ il mont. Il uestri cûr nol à di conturbâsi e nol à di butâsi jù. O vês sintût che us ài dit: O voi e o tornarai di vualtris. Se mi volessis ben, o saressis contents che jo o voi dal Pari, parcè che il Pari al è plui grant di me. E cumò us al ài dit prime che al sucedi, di mût che, cuant che al sucedarà, o crodedis».

Peraule dal Signôr.

Si dîs O crôt.

Su lis ufiertis

Che a rivin fin li di te, Signôr,
lis nestris preieris dutune cu lis ufiertis,
in mût che, smondeâts midiant de tô gracie,
o sedin plui disponûts ai misteris dal to grant bonvolê.
Par Crist nestri Signôr.

Antifone a la comunio Zn 14,15-16

Se mi volês ben, o metarês in pratiche i miei comandaments,
al dîs il Signôr.

Jo o prearai il Pari e lui us darà un altri Confuartadôr,
di mût che al sedi cun vualtris par simpri, aleluia.

Daspò de comunion

Diu onipotent e eterni,
che cu la resurezion di Crist tu nus ricolmasti pe vite eterne,
fâs cressi in nô i benefizis dal sacrament di Pasche
e rinfuarce i nestris cûrs cun cheste mangjative di salvece.
Par Crist nestri Signôr.